



La delegaziun romantscha che ha gudiu la jamna a Berlin se presenta avon il portal da Brandenburg: Dominic Blumenthal, Rafael Summerauer e Flurin Caviezel (da sen.).

Treis Romontschs a Berlin

■ Dils 15–20 da december han treis giuvens Romontschs giu la pussevialdad da separticipar ad in seminari dalla YEN a Berlin. La YEN (Youth of European Nationalities) ei l'organisa-ziun tetgala dad unions da minoritads ord l'entira Europa cun sedia en la capitala tudestga. Ils treis commembers dalla Giuru Flurin Caviezel, Rafael Summerauer e Dominic Blumenthal han astgau representar la Romontschia a Berlin. Il seminari che steva sut il motto «be minority – be strong» ha giu l'intenziun da presentar la YEN e sia lavur sco era la politica da minoritads en Tiaratudestga. Priu part dil seminari han rodund 35 giuvens e giuvnas ord siat differentas tiaras.

Il program vast ed interessant ha entschiet il venderdis cun ina sentupada cun la parlamentaria tudestga Maria Michalk. La representanta dalla Partida socialdemocratica ei Sorba e defenda dapi varga vegn onns ils interess dallas minoritads en Tiaratudestga. Oravontut dus puncts dalla discussiun cun Dunna Michalk han pariu interessants. Per l'ina ha ella explicau co il sistem politic dil grond vischin el nord funcziun-

na. Entras il sistem parlamentaric ein las partidas sfurzadas dad anflar ina coaliziun (maioritad da silmeins 50% dallas vuschs) per astgar metter la regenza per ina legislatura da quater onns. Michalk ha declarau che la lavur dalla opposiziun seigi savens frustronta, perquei ch'ina gronda part dalla lavur fatga setschenti savens directamein el canaster da pupi.

Maria Michalk ha plinavon accentuau siu meini pertuccont la representaziun politica da minoritads. Sin la domanda sch'ei fussi buca pli effectiv dad agir cun partidas da minoritads ha ella argumentau ch'ei empermetti dapli success da representar ils interess dallas minoritads entras las partidas etablid. Era cheu vala la medema logica: Senza esser ella regenza eis ei grev da contonscher enzatgei ella politica tudestga e la probabilitad ch'ina pintga partida dad ina minoritad sappi far part dalla regenza ei fetg pintga.

La sonda han tut ils participonts presentau lur minoritads ed organisaziuns da giuventetgna. Gronda impressiun ha oravontut la situaziun dils Roma e Sint-ti fatg – aunc ozildi ein els confruntai

cun fetg bia pregiudezis ed han entras quei savens era problems da s'integrar ella societad.

La dumengia han ins giu la caschun dad emperder co organisar e finanzia in agen project. Gliendisdis, il davos di dil seminari, havein nus visitau las organisaziuns ed instituziuns da minoritads a Berlin.

Sper tut quellas informaziuns ei il seminari era ina pussevialdad dad emperder d'enconuscher glied giuvna ord l'entira Europa, sco era la cultura, ils problems e success dad autras minoritads. Ina experienscha nunemblideivla vegn segir a restar bein en memoria als treis Romontschs: Cuschinar bizochels per rodund 40 persunas ei buc aschi sempel sco quei ch'ins pudess tertgar. Stau eisi legher!

Per il seminari da Pastgas 2017 dat ei puspei la pussevialdad da tarmetter ver treis giuvnils u giuvnilas ad in jamna da project ad Albania. S'annunzia tier la Giuru sche ti eis denter 16 e 35 onns vegls, has temps ed interess dad ir a visitar ils Aromuns che discoran in lungatg neolatin parentau al nies cun influenza slava.

Dominic Blumenthal



Ina part dalla gruppa da giuvnils ord differentas minoritads el baghetg dil ministeri digl intern a Berlin.

FOTOS D. BLUMENTHAL

EDITORIAL

25x in plaschair

Dapi in mais sa preschenta la pagina da la Giuru en in nov stil. Sco activitad d'inauguraziun avain nus creà in chalender d'advent cun la schanza da gudar mintga di in premi ord la Rumantschia. Concret avain nus regalà intgins cudeschs ed in comic rumantsch, duas entradas per concerts a Cuira da Me+Marie e Giganto&Mattiu, specialitads grischunas sco in andutgel ed ina buna turta da nuschs u in paun cun paira, differents albums gist cumparids, in pac da surpraisa da la Giuru, ma era vestgadira per l'enviern sco guants, ina schlingia

e chapitscha. Uschia avain nus creà la pussaivladad da sperar mintga di d'advent fin Nadal sin in regal. Nus avain fatg 25x in pitschen plaschair ad ina persuna e nus sperain ch'ils singuls pacs arrivian prest tar ils adressats – sch'els èn betg daditg arrivads e gia mangiads. Qua tras è il 25avel onn da la Giuru arrivà ad ina bella fin. Bun divertiment cun ils premis e nus ans legrain vinavant da vossas visetas en l'onn nov sut www.giuru.ch nua ch'ins po per exempel sut «actual» mintga mais telechargiar questa pagina sco pdf.

Flavia Hobi



Gion-Andri Cantieni ha programmà la tecnica dal chalender digital e la suprastanta Alina Müller ha organisà ils regals, pachetà en quests e tramess a las adressas che nosa roda da fortuna ha tscherni.

FOTO A. MÜLLER

Emprima Sentupada Cumadaivla Turitg

■ Digt han las scuntradas rumantschas a Turitg ruassà. Per s'entupar e terminar il semester d'atun cun ina festa è la giuventetgna enturn las universitads turitgaisas sa rimmada ad ina lucca saira da cumpagnia. Betg be students e studentas dal seminari rumantsch, mabain er auters Rumantschs d'ordaifer èn vegnids. Malgrà il temp turbulent avant Nadal èn var ventg Rumantschs suandats l'invit, blers che frequentan rumantsch sco lur rom lateral, ma era novas fatschas e vegls enconuschents. Quai ha fatg grond plaschair da vesair vus – cunzunt ils organisaturs da l'emprima saira, Uolf Candrian e Victoria Mosca, engrazian fitg a tuts ch'èn stads! Cun l'adattaziun dal sistem d'educaziun a Bologna 2020 restrenscha l'universitad la diversitad e limitescha ils students sin ina u maximal duas carrieras a 120 puncts per il rom principal e 60 puncts per il rom lateral. Per ils proxims quatter onns è il rom lateral rumantsch da 30 puncts excepziunalmain anc avert. In student interessà en sociologia ed economia po davent dal 2020 betg pli frequentar rumantsch senza limitar sasez, per ils roms pitschens resta nagin spazi.

Che l'ETH, ina scola auta da renum mundial, ristga cun stritgar ina quantitat banala dad in 1500avel da ses budget annual per il rom rumantsch exact quest renum lascha ponderar. Ina situaziun critica che pretenda discussiuns e schliaziuns creativas. Per quai duai la cuminanza rumantscha daventar pli activa e pli colligiada. Las discussiuns n'èn betg liantas ed emprima lingia e betg il rumantsch tema central, mabain las sairas duain porscher la chaschun da baterlar en la lingua materna. Las sentupadas cumadaivlas duain avair lieu il mardis saira, silpli trais giadas mintga semester. Tgi che ha interess da far part dad ina saira e vul retschaver in invit duai s'annunziar cun in mail a giuru@giuru.ch u cun scriver sur whatsapp a 078 947 83 94. La Giuru ha offrì in'emprima runda pajada a bunmain tuts preschents, tranter intginas stangas era tès ed ina rivella. Tuts che han fatg part da l'emprima sentupada cumadaivla s'allegressan da pudair beneventar ulteriusas novas fatschas a la proxima scuntrada rumantscha a Turitg ed infurman direct ils interessads cura ch'il termin è fixà. Cordial invit a tuts Rumantschs, a la proxima.

Uolf Candrian



In'impressiun plitost tardiva da l'emprima sentupada cumadaivla en in lieu plitost fullan èn vischinanza da l'universitad.

FOTO S. BUCHLI